

**■ COLUMNA**

# Popular u populistich?

DA GIUSEP NAY

**A**ntruras era populara la devisa «per il pievel, cun il pievel». Oz è il privel grond che vegnan populars era slogans populistics. Quels surmainan e tschorventan il pievel e fan ina politica cunter quel. Sch'ina partida politica snega dretgs fundamentals a conumans che vivan e lavuran en Svizra per noss bainstar, che n'han però nagin passaport svizzer, e sch'ella disfamescha quels en ina moda e maniera ch'ils uvestgs svizzers – cun in'exceptiun zunt deplorabla e ch'ins po strusch crair – qualifitgeschan sco blasfemia, alura na po ella betg pretender d'esser ina partida dal pievel. Noss conumans senza passaport svizzer fan, sco tut ils auters, part da la populaziun svizra e pia dal pievel.

**I**ns carteva d'avair supeirà campagnas cunter ina part dal pievel, escludida da quel, sco quai che han fatg ils nazis cun consequenzas terriblas vers la fin dals onns 1930 e durant la Segunda guerra mundiala per Gidieus, zagrenders, mendus e per tut quels che ristgavan da s'opponer. La campagna d'ozendi ha però cumenzà sumegliantamain e quai era cun discreditat dretgiras e derschaders, gist sco quai ch'i vegn fatg oz.

**P**assa 70% dal pievel vulan che la cussegliera federala *Eveline Widmer-Schlumpf* vegnia reelegida. Ed ina da las finamiras principalas da la medema partida è d'impedir la reelecziun da questa magistrata competente e suverana. Co sa



cunfa quai: vulair esser ina partida dal pievel, però defender in'opiniun ch'è cunter la clera voluntad dal pievel, schizunt cunter quella dad ina part dals agens partisans? La glista da talas cuntradicziuns pudess vegnir prolungada, sch'ins observa criticamain la tendenza politica d'excluder tuts ch'èn d'otra opiniun, cunzunt sin quels secturs, nua che mo ils interess da l'economia e dal profit da paucs ritgs e potents vegnan defendids. Quai ch'è il pli alarmant n'è betg exnum quella politica, mabain quant sustegn ed intimaziun ch'ella survegn.

**D**a s'engaschar per ils idioms rumantschs è franc popular. Populistic è però da discreditat, sche betg perfin diabolisar il rumantsch grischun. Betg infurmar correctamain e far propostas areguard il rumantsch en scola che na resguardan betg era la cumpetenzza dal chantun tenor la lescha da linguas mo surmaina las votantas ed ils votants e fa maldiever dal dretg d'iniziativa. Il chantun e la Dretgira administrativa vegnan, sche las votantas ed ils votants na fan betg quai, a stuaier far las correcturas necessarias

en l'interess da l'entira Rumantschia.

**P**er il pievel, cun il pievel» vul cunzunt dir che partidas politics ed exponents da la politica en las autoritads lavuran ensemen cun auters represchentants dal medem pievel e betg in cunter l'auter. La concordanza sco gronda valor democratica svizra na signifitga betg simplamain ch'ils mandats en il cussegl federal stoppian vegnir repartids aritmeticamain tenor la fermezza da tuttas partidas. Quella ha gi e po er en il futur avoir ina gronda valor mo cun reparter ils mandats sin las partidas prontas da collavurar sinceramain e cun respect, era envers autras opiniuns. La tendenza populistica, nua ch'ina partida sa tut e vul alura era pudair decider tut e nua candidatas u candidats n'èn betg pronti da collavurar tuts in cun l'auter, è privlusa, e quei sin mintga stgalim.

**T**ut quai na dastga betg daventar popular e betg survegnir succurs. E quai na daventa era betg popular, sche pli bleras votantas e votants sortan da lur reserva concernent la politica da partidas – sco quai ch'il columnist fa cun questas lingias – essend ch'igl è pli che urgent. I munta far frunt a tut il populissem cun ir a l'urna ed eleger partidas e candidatas e candidats che respectan e na vulan betg excluder tut ils auters. Uschè simpel è quai atgnamain en nossa democrazia directa. I vul però esser fatg, sche nagin vul ristgar da stuaier udir in di la renfatscha dad avoir elegì sez ses mazler.